

Pisortat ataatsimoortumik allaffissornerisa aaqqissugaanerannut atatillugu naliliinissamut ataatsimiititaliarsuarmik pilersitsisoqarnissaanut Naalakkersuisut peqquneqarnissaannut Inatsisartut aalajangiiffigisassaattut siunnersuut. Maanna suliassaasut aallaavigalugit allaffissornerup annertussusaa ataatsimiititaliarsuup nalilersussavaa, suleriaatsit sunniuteqarluarnerusut pilersinnissaannut immikkoortorta qarfiillu suliassa qarfiillu (sektorit) akimorlugit suleqatigiinnerup pitsanngorsaaviginissaanut periarfissat misissussallugit, kiisalu allatut aaqqissuussinissamut periarfissanik siunnersuuteqarluni. Siunnersuutini tamani inatsisit ingerlatsinermut tunngasut qasukkartinneqannginnissaat aallaaviussaaq. Ataatsimiititaliarsuaq inunnit sektorinit assigiinngitsuneersunit inuttaqassaaq, tassa pisortat sektoriineersut aamma namminersortut sektoriineersut ilaasortat misilittagaqartut amerlaqatigiissallutik. Ataatsimiititaliarsuaq assigiinngisitaartuneersunit ilaliussanik sulisitaqassaaq, sulininilu ukiut marluk iluanni naammassissallugu. Tamatuma kingorna ataatsimiititaliarsuup innersuussutai Inatsisartuni politikkikkut suliarineqassapput.

(Inatsisartuni ilaasorta, Peter Olsen, Inuit Ataqatigiit)

Akissuteqaat

(Aningaasaqarnermut Akileraartarnermullu Naalakkersuisoq)

Aappassaaneerpeqarnera

Inatsisinut Ataatsimiititaliap isumaliutissiissutaannut peqqissaartumut paasissutissiilluartumullu Naalakkersuisut qujapput.

Naalakkersuisut naammagisimaarput, ataatsimiititaliap isumaqatigiissup, allannguutissatut siunnersuut saqqummiunneqartoq siullermeerneqarnerani innersuussutiginera. Akuersinermi tassunga ilaavoq: *“Immikkoorto qarfiit susassa qarfiillu akimorlugit suleqatigiinnerit pitsanngorsarsinnaajumallugit Naalakkersuisut Aaqqissuusseqqinnissat suliassanillu nuutsinissat pisariaqartut piareersarsinnaajumallugit kommuninik suleqateqarnerminni suleriaatsinik pitsaanagerusunik sunniuteqarnerusunillu pilersitsinissamik peqquneqassapput, allanngortitsinernik aamma suliassanik nuutsitsinernik attuumassuteqarsinnaasunik piareersaaqquneqassapput. Taamatut suliniuteqarnermi allaffissornikkut periutsit nalinginnaasut qulakkeerlugit atorneqarnissaat isiginiarneqassapput.”*

Pisortani suliassa qarfiup aaqqissornerani sulinerup ingerlaqqinnerani, matuma ataani kommunit suleqatigalugit kiisalu ataatsimoortumik tapiissutit siunissami isumaqatigiissutigineqarnerannut atatillugu Naalakkersuisut tamanna tunngavigissavaat.